

BASSETT, CHRISTOPHER (1753 - 1784), offeiriad Methodistiaidd

Enw: Christopher Bassett
Dyddiad geni: 1753
Dyddiad marw: 1784
Rhiant: Alice Bassett
Rhiant: Christopher Bassett
Rhyw: Gwryw
Galwedigaeth: offeiriad Methodistiaidd
Maes gweithgaredd: Crefydd
Awdur: Gomer Morgan Roberts

Ganed yn Aberddawen, plwyf Penmarc, mab Christopher ac Alice Bassett, ill dau yn ddilynwyr [Howel Harris](#). Addysgwyd ef yn ysgol ramadeg y Bontfaen a Choleg Iesu Rhydychen, lle y graddiodd yn B.A. yn 1772 (M.A. yn 1775). Ordeiniwyd ef gan esgob Llundain a bu'n gurad dan yr enwog William Romaine yn S. Anne, Blackfriars; dewiswyd ef hefyd yn ddarlithydd S. Ethelburga.

Collodd ei iechyd a dychwelodd i Gymru; penodwyd ef yn gurad S. Ffagan yn 1778, a bu'n gurad wedyn ym Mhorthceri; casglodd seiat Fethodistaidd at ei gilydd yn y ddau le. Teithiodd a phregethodd yn siroedd y Deheudir ymhlith y Methodistiaid.

Gwaethygodd ei iechyd yn 1783 ac aeth i dy ei chwaer ym Mryste i atgyfnerthu; bu farw yno o'r darfodedigaeth 8 Chwefror 1784, a dygwyd ei gorff i'w gladdu ym mynwent S. Athan. Canwyd marwnadau i'w goffadwriaeth gan [John Williams](#), S. Athan, a [William Williams](#), Pantycelyn. Cyhoeddodd [David Jones](#), Llan-gan, lyfryn ar achlysur ei farwolaeth, *Llythyr oddi wrth Dafydd ab Ioan y Pererin at Ioan ab Gwilim y Prydydd ...* (Trefecca, 1784), yn rhoi hanes ei fywyd.

Awdur

Y Parchedig Gomer Morgan Roberts, (1904 - 1993)

Ffynonellau

D. Jones, *Llythyr oddi wrth Dafydd ab Ioan y pererin [i.e. David Jones] at Ioan ab Gwilim y prydydd [i.e. John Williams], yn rhoddi byrr hanes o fywyd a marwolaeth y Parchedig Christopher Basset, Athraw yn y Celfyddydau, o Aber-ddawen, yn Sir Forganwg ... ynghyd â marwnad ar ei farwolaeth, a gyfansoddwyd gan Ioan ab Gwilim mewn ffordd o lythyr at ... Dafydd ab Ioan* (1784)

Methodistiaeth Cymru (1851–6), iii, 94

J. Morgan Jones a W. Morgan, *Y Tadau Methodistiaidd (1895-1897)*, ii, 129-33

Cymru (O.M.E.), xv, 24

Darllen Pellach

William Williams, *Marwnad ar farwolaeth y Parchedig Mr. Cristopher Basset, y iefangaf o Aberddawen yn Sir Forganwg Athro Celfyddydau: yr hwn a ymadawodd â'r byd yr 8 o Chwefror, 1784. Yn yr 31 flwyddyn ei oed, ac a gladdwyd yn Saint Athens* (Aberhonddu 1784)

Erthygl Wicipedia: [Christopher Bassett](#)

Dolenni Ychwanegol

Wikidata: [Q5111917](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

